

LISTOVI...

GRAČANIČKI GLASNIK
časopis za kulturnu historiju

Broj 61
Godina XXXI
Maj, 2026.
[str. 269-288]

© Monos 2026

LISTOVI...

Listovi gračaničkog kalendara od 1. 11. 2025. do 28. 4. 2026.

Omer Hamzić

13. 11. 2025.

***Književna večer posvećena Dervišu Sušiću
održana u Gračanici***

Književnu večer organizovala je Narodna biblioteka "Dr. Mustafa Kamarić". Nastupili su reditelj Mustafa Sušić i prof. dr. Mirsad Kunić, koji su govorili o književnom, dramskom i društvenom naslijeđu Derviša Sušića, njegovom angažmanu i odnosu prema bosanskoj historiji i identitetu, te o trajnim vrijednostima njegovih romana i drama. Odabrane odlomke iz Sušićevih djela interpretirao je gračanički glumac Miralem Džaferović. Bila je to prilika da se podsjeti na Sušićeve veze s Gračanicom po rođачkoj liniji, kao i na ratne drugove iz ovog kraja koje je spominjao u svojoj književnoj prozi i tako Gračanicu uveo trajno u svoj literarni svijet. Događaj je okupio brojne posjetioce i još jednom potvrdio mjesto Gračanice u prostoru kulturnog pamćenja i njegovanja književne tradicije. Izvori: *Radio Gračanica; Narodna biblioteka "Dr. Mustafa Kamarić"*.

28. 11. 2025.

Održana 13. sjednica Gradskog vijeća Gračanica: u sjeni rutinskih tačaka, izdvajaju se dvije informacije koje govore o razvoju i svakodnevicu grada

U informaciji o realizaciji projekata finansiranih sredstvima viših nivoa vlasti predstavljeni su rezultati projektnih aktivnosti u periodu 2024–2025. godine. Kandidovana su ukupno 42 projektna prijedloga, od kojih su sredstva odobrena za 22 projekta. Ukupno ostvarena grant sredstva iznose nešto više od 3,39 miliona KM, pa sa učešćem Budžeta Grada vrijednost realiziranih i odobrenih projekata prelazi 4,42 miliona KM. Među završenim kao i projektima u realizaciji posebno se izdvajaju: sanacija južne fasade nacionalnog spomenika Konak (zgrada Gradske uprave), regulacija korita rijeke Sokoluše, rekonstrukcija i dogradnja dijelova magistralnog vodovodnog cjevovoda i distributivne mreže, izgradnja fekalne i oborinske kanalizacije u više gradskih i prigradskih naselja, uklanjanje divljih deponija na širem području grada, sanacija i rekonstrukcija lokalnih puteva u mjesnim zajednicama Gračanica, Donja Orahovica i Malešići, kao i radovi na energetskom unapređenju (utopljanju) javnih objekata – Bosanskog kulturnog centra, Doma zdravlja i infrastrukturno opremanje Privredno-kulturno-sportskog centra “Bazen”. Dio projekata nije realiziran zbog

proceduralnih razloga. Druga informacija odnosila se na stanje javnog prevoza putnika, koje je dodatno usložnjeno nakon izmještanja autobuske stanice iz centra grada. Na području Gračanice linijski prevoz trenutno obavljaju tri prijevoznika, s ukupno četrdeset vozničkih jedinica, a mreža linija pokriva sve mjesne zajednice osim MZ Buk. Posebno je naglašeno da je posljednje cjelovito usklađivanje gradskih redova vožnje izvršeno još 2008. godine, te da je od tada broj polazaka i povrataka znatno smanjen – sa početnih 139 polazaka i 138 povrataka na današnjih 114 polazaka i 106 povrataka koji se redovno održavaju. Kao jedan od najvećih problema istaknuto je stanje autobusnih stajališta: dio planiranih stajališta još nije izgrađen zbog nedobijanja saglasnosti ili kašnjenja u izvođenju radova, dok grad uopće nema postavljene urbane nadstrešnice za putnike, što značajno utiče na kvalitet usluge prevoza putnika, naročito u zimskom periodu. U taksi-prevozu stanje je stabilnije, s petnaest aktivnih prijevoznika i smanjenim brojem nelegalnih vožnji. Iako bez velikih političkih rasprava, 13. sjednica Gradskog vijeća pokazala je da se iza administrativne svakodnevice kriju teme od dugoročnog značaja – način na koji se koriste grantovska sredstva i stanje javnog prevoza ostaju među ključnim pokazateljima kvaliteta života i razvojnih prioriteta Gračanice. *Izvor: Materijali*

za 13. sjednicu Gradskog vijeća Grada Gračanica, novembar 2025.

30. 11. 2025.

***Umro Muharem Ahmedbegović–
ugledan džematlija, vakif i jedan
od ključnih nosilaca izgradnje
Šarene džamije u Gračanici***

Rođen 1934. godine u Gračanici, cijeli život proveo je u svom gradu, gdje je bio snažno vezan za džemat i lokalnu zajednicu. Kao član Građevinskog odbora i njegov dugogodišnji blagajnik, dao je značajan doprinos izgradnji Šarene džamije, u čijem je nastanku i dovršenju imao istaknuto mjesto kao vakif. U mahali i među sugrađanima bio je prepoznat kao pouzdan i skroman čovjek, uvijek spreman pomoći. Njegov život obilježila je i porodična ratna tragedija – pogibija sina Mehmeda Ahmedbegovića, nosioca “Zlatnog ljiljana”, 1992. godine u odbrani Gračanice. Preselio je na Ahiret 30. novembra 2025. godine u 92. godini života, a ukopan je 3. decembra u haremu Šarene džamije, što je u Gračanici doživljeno kao rijetka počast. (Opširnije čitajte u rubrici “Likovi zavičaja” u ovom broju časopisa).

1.12. 2025.

***Sanacija “Konaka” u Gračanici:
mali potpis, veliki simbol***

Potpisivanje ugovora o sufinansiranju sanacije krova na nacionalnom spomeniku “Konak” u Gračanici, između ministricе prostornog ure-

đenja i zaštite okolice TK Anele Ajšić i gradonačelnika Sadmira Džebe, možda se na prvi pogled čini kao obična administrativna činjenica — jedan u nizu protokolarnog potpisivanja papira. Međutim, Konak je više od starog zida i krova koji prokišnjava. On je ključna tačka orijentalno-balkanske urbane matrice čaršije, zgrada koja je stoljeće i po za nama bila tihi svjedok promjena vlasti, uprava i društvenih tokova. Danas sanacija znači čuvanje materijalnog svjedoka gradske povijesti, ali i obnovu simboličkog mjesta koje spaja administrativnu tradiciju, zanatsko-pazarni duh i svakodnevni život Gračanice. Vijest o odobrenih 237.900 KM iz namjenskih sredstava ekoloških naknada nije samo jedan potez administracije, nego signal da se odnos prema kulturno-historijskom naslijeđu pomjera iz deklarativnog u mjerljivu akciju. Sanacijom krova otvara se prostor da se u budućnosti Konak obnovi u punom kapacitetu, kao reprezentativni objekt gradske uprave, ali i kao arhitektonski marker generacijama koje dolaze. Postavljeni rok završetka radova od 270 dana je, nadamo se, realno postavljen.

1. 12. 2025.

**Obilježena 32. godišnjica
212./222. bosanske oslobodilačke
brigade**

U organizaciji Udruženja “Veterani rata 212./222. bosanske oslobodilačke brigade” obilježen je Dan formiranja brigade, uz niz prigodnih aktivnosti koje su započele polaganjem cvijeća na šehidskom mezarju Šabuša. Cvijeće je položeno i na mezar komandanta brigade Bahrije Džananovića, uz prisjećanje na njegov doprinos u odbrani domovine. Nakon odavanja počasti, pripadnici brigade, zajedno s učenicima srednjih škola, prošetali su gradom u svečanom defileu koji je završen kod Centralnog spomen-obilježja, gdje su delegacije također položile cvijeće. Centralna manifestacija obilježavanja Dana formiranja 212./222. bosanske oslobodilačke brigade najavljena je za naredni dan u Lukavcu. *Izvor: Službeni portal Grada Gračanica.*

5. 12. 2025.

**Položen kamen temeljac za
novi smještajni objekat u
Prihvatnom centru “Duje”**

Time je započeta izgradnja prvog od tri planirana objekta u okviru ovog Prihvatnog centra. Ovo je važan iskorak u unapređenju uslova smještaja i svakodnevnog života korisnika centra u kojem je trenutno zbrinuto oko 480 korisnika – starih i nemoćnih osoba, kao i osoba s mentalnim i drugim zdravstvenim poteškoćama.

Planirani razvoj podrazumijeva izgradnju tri nove, funkcionalne i savremeno opremljene zgrade koje će zamijeniti postojeće objekte i osigurati znatno bolje standarde brige, prilagođene i osobama s invaliditetom, uz adekvatne kapacitete za zdravstvenu njegu i rehabilitaciju. Izgradnja prvog objekta realizuje se zahvaljujući donaciji i podršci Crkve Isusa Krista Posljednjih Dana. *Izvor: Radio Gračanica.*

14. 12. 2025.

**“Zima u Gračanicu” – od 14. 12.
2025. do 1. 1. 2026.**

Manifestacija donosi praznični program na otvorenom, u kojem se smjenjuju dječiji sadržaji, koncertne i DJ večeri, izložbeni program i završnica uz novogodišnji doček. U fokusu je porodična atmosfera i sadržaji za najmlađe – od otvaranja sezone uz animatore, maskote i podjelu slatkiša, do posebnog programa “Dječija Nova godina”. Klizalište je najavljeno kao jedan od centralnih zimskih sadržaja, uz muzičke nastupe kroz više decembarskih datuma, uključujući akustičnu večer i koncertne programe. U okviru manifestacije planirana je i izložba slika polaznika škole slikanja, a decembarski dio programa zatvara “Boja noći” kao muzička večer. Doček Nove godine najavljen je uz nastupe Tijane Dapčević i drugih vokalnih zvijezda i ansambalai.

19. 12. 2025.

Počelo sa radom Klizalište u Gračanici, za ovu sezonu

U sklopu manifestacije "Zima u Gračanici", otvoreno je gradsko klizalište koje će obogatiti zimske dane i donijeti radost ljubiteljima klizanja i zimskih sadržaja. Klizalište će biti otvoreno za posjetioce do kraja januara 2026. godine.

24. 12. 2024.

Otvoren Bingo City Center Gračanica: savremeni trgovačko-zabavni prostor i CineStar kino – nova urbana tačka grada

Investicija vrijedna 40 miliona KM, zamišljena kao savremeni trgovačko-zabavni centar u kojem se na jednom mjestu objedinjuju kupovina, gastronomija, rekreacija i zabava. Centralno mjesto zauzima Bingo market, s prodajnom površinom većom od 6.500 m², dok ukupna površina marketa prelazi 9.000 m². U sklopu marketa najavljeni su i istaknuti prehrambeni segmenti (pekara, slastičarna, mesnica i gastro-odjel), kao i ponuda odjeće i obuće, namještaja i dekoracija, tehnike, alata i vrtnog programa. Na spratu objekta su sadržaji koji šire funkciju centra: ugostiteljska ponuda, kuglana, All In Fitness i CineStar kino koje raspolaže s tri dvorane ukupnog kapaciteta oko 400 sjedišta, uz savremenu projekcijsku i zvučnu opremu. Najavljeno je i fazno širenje: po završetku radova, Bingo

City Center Gračanica trebalo bi da se prostire na više od 32.000 m², uz 384 parking mjesta, od čega 226 garažnih. Otvaranje centra dodatno učvršćuje trend jačanja komercijalne ponude i ambijenta više trgovačkih sadržaja u Gračanici, uz naglašenu ulogu grada kao regionalnog središta kupovine i usluga. Izvori: RTV Slon; Radio Gračanica; portal Grada Gračanica; Dnevni avaz.

15. 12. 2025.

Promocija 60. jubilarnog broja "Gračaničkog glasnika"

Promocijom 60. broja "Gračaničkog glasnika", obilježeno je 30 godina neprekidnog rada časopisa kao jedinstvene mega hronike grada i "bilježnika" zavičajne prošlosti. Prema riječima osnivača i glavnog urednika prof. dr. Omera Hamzića, Glasnik je zamišljen kao dokument vremena i otpor zaboravu. O uredničkom i autorskom kontinuitetu Časopisa govorili su mr. sc. Rusmir Djedović i Zlatko Dukić, dok je prof. dr. Edin Mutapčić ukazao na širi akademski značaj *Glasnika*, najavljujući Međunarodnu naučnu konferenciju "Država i pravo – izazovi i perspektive / Gračanička škola lokalne historije", koja će se održati na Pravnom fakultetu u Tuzli 18. 12. 2025. Jubilarni broj donosi historiografske, dokumentarne i književne priloge, potvrđujući da "Gračanički glasnik" ostaje trajni zapis o prostoru, ljudima i vremenu.

18. 12. 2025.

Naučna konferencija “Država i pravo – izazovi i perspektive: gračanička škola lokalne historiografije”

Održana je u povodu 30 godina neprekidnog izlaženja časopisa “Gračanički glasnik” i 50 godina naučnog i spisateljskog rada njegovog osnivača i glavnog urednika dr. Omera Hamzića. Konferenciju su organizirali Pravni fakultet Univerziteta u Tuzli i Naučno društvo pravnika Tuzlanskog kanton. Okupili su skoro 40 istraživača iz oblasti historije, prava, arhivistike, teologije, književnosti, muzeologije i srodnih disciplina koji su se u svojim izlaganjima manje više dotakli takozvane gračaničke škole lokalne historije i “Gračaničkog glasnika” kao platforme na kojoj se izgrađivala ta škola. U plenarnom dijelu Konferencije izložena su četiri referata koja su postavila tematski i konceptualni okvir cjelokupnog skupa. Prof. dr. Izet Šabotić (Filozofski fakultet Univerziteta u Tuzli) izložio je referat “Doprinos dr. Omera Hamzića razvoju bosanskohercegovačke historiografije”, u kojem je analizirao višedecenijski naučni i istraživački rad Omera Hamzića, s posebnim osvrtom na njegov doprinos razvoju lokalne historiografije i kritičkoj obradi izvora. Prof. dr. Adnan Jahić (Filozofski fakultet Univerziteta u Tuzli) prezentirao je referat “Drugi svjetski rat u historio-

grafskim radovima Omera Hamzića”, naglašavajući značaj lokalnih i regionalnih perspektiva u interpretaciji ratnih događaja i metodološku povezanost mikrohistorije sa širim historijskim procesima. Mustafa ef. Cerić, bivši reisu-l-ulema Islamske zajednice u Bosni i Hercegovini, izložio je referat “Islam i oblikovanje civilizacijskog obrasca u Bosni: primjer Gračanice”, u kojem je razmotren utjecaj islama na oblikovanje lokalnog civilizacijskog, kulturnog i društvenog identiteta, s posebnim fokusom na Gračanicu kao primjer dugotrajnog historijskog kontinuiteta. Prof. dr. Edin Mutapčić (Pravni fakultet Univerziteta u Tuzli), ujedno predsjednik Organizacionog odbora konferencije, predstavio je referat “Gračanički glasnik i Omer Hamzić – gračanička škola lokalne historiografije”, u kojem je elaboriran koncept gračaničke škole lokalne historije kao istraživačkog i interpretativnog modela razvijanog kroz višedecenijsko djelovanje časopisa Gračanički glasnik. Nakon plenarnog dijela, konferencija je nastavila rad kroz dva tematska panela, u okviru kojih su predstavljani brojni referati iz oblasti lokalne i regionalne historije, prava, arhivistike, bibliografije, demografije, muzeologije i kulturalnih studija. Za konferenciju je bilo prijavljeno više od 40 tema i učesnika, dok je u neposrednom radu učestvovalo oko trideset izlagača, što svjedoči o značajnom

interesu akademske i stručne javnosti za tematiku skupa. Na završetku konferencije usvojeni su zajednički zaključci, u kojima je naglašena potreba daljnjeg sistematskog istraživanja lokalne historije, jačanja interdisciplinarnog pristupa i afirmacije lokalnih časopisa i arhiva kao relevantnih naučnih izvora.

30. 12. 2025.

Održana 14. sjednica Gradskog vijeća: usvojen Budžet Grada za 2026. godinu u iznosu od 29.020.000 KM.

prihodi i primici planirani su u istom iznosu: 25.820.000 KM odnosi se na prihode tekuće godine, 20.000 KM na kapitalne primitke, dok je 3.180.000 KM obezbijedeno iz prenesenog suficita prethodne godine. U strukturi prihoda, porezni prihodi iznose 15.976.910 KM, neporezni prihodi 3.692.400 KM, tekući transferi i donacije 312.847 KM, dok su kapitalni grantovi planirani u iznosu od 5.837.843 KM. Ukupni rashodi Budžeta iznose 17.303.182 KM, kapitalni izdaci 10.278.818 KM, a za otplatu ranije preuzetih kreditnih obaveza planirano je 1.228.000 KM. Gradsko vijeće je dalo saglasnost na nove cijene vodnih usluga koje će se primjenjivati od 1. januara 2026. godine. Ukupna cijena vode i kanalizacije za domaćinstva iznosi 1,55 KM/m³ bez PDV-a, odnosno 1,81 KM/m³ sa uračunatim PDV-om (17%), dok za pravna lica ukupna cijena iznosi 2,75

KM/m³ bez PDV-a, odnosno 3,22 KM/m³ sa PDV-om. Usvojeno je i linearno povećanje cijene gradskog grijanja za 10%. Nova cijena za domaćinstva iznosi 0,1347 KM/kWh bez PDV-a, odnosno 0,158 KM/kWh sa PDV-om, dok za privredne subjekte i javne ustanove iznosi 0,1724 KM/kWh bez PDV-a, odnosno 0,202 KM/kWh sa PDV-om. Ukupni -om. Razmatrana je i Informacija o stanju u kulturi i realizaciji projekata iz kulture u 2025. Za kulturu su planirana i izdvajana sredstva: 520.000 KM za redovan rad Bosanskog kulturnog centra (BKC), 20.000 KM za Zavičajnu zbirku, 120.000 KM za kulturne događaje od gradskog značaja, 13.000 KM za časopis "Gračanički glasnik", te 240.000 KM za utopljavanje objekta BKC-a (Faza II). Ukupno po navedenim stavkama planirano je 913.000 KM, uz dodatnih 110.000 KM sufinansiranja kulturnih projekata nevladinog sektora putem javnih poziva, što ukupno čini 1.023.000 KM planirane podrške kulturnim sadržajima i projektima. Razmatrana je i Informacija o stanju sporta na području grada Gračanica u 2025. godini, prema kojoj u gradu djeluje više od 30 sportskih klubova, kolektiva i udruženja, uz snažan fokus na omladinski i školski sport. U 2024. godini za sport je iz Budžeta Grada izdvojeno ukupno 2.326.934 KM, od čega 928.025 KM kroz budžetske transfere sportskim kolektivima i savezima, te 1.398.909 KM kroz kapitalna i infrastrukturna ulaganja.

Najznačajniji projekat bio je završetak i puštanje u rad Sportske dvorane "Bazen", za koji je u 2024. godini izdvojeno 1.044.616 KM, uz ulaganja u sportske terene i objekte u mjesnim zajednicama.

8. 1. 2026.

Umro "Zlatni ljiljan" Sead Mahmutović iz Miričine

Sead Mahmutović rođen je 15.03.1957. godine u Rašljevi. Nakon osnovne i srednje škole radio je u preduzeću Putničkog saobraćaja "Avis" kao kontrolor i saobraćajni tehničar. I prije izbijanja agresije na BiH bio je uključen kao organizator prvih seoskih straža i jedinica TO na području svog sela. Nakon konsolidacije odbrane Gračanice (formiranja bataljona i brigada) bio je pripadnik 221. brdske brigade, a ratno priznanje "Zlatni ljiljan" dodijeljeno mu je 1996. godine, kao priznanje za izuzetnu hrabrost i doprinos u odbrani zemlje. Seada Mahmutovića njegovi ratni drugovi, prijatelji i komšije pamte kao heroja i čovjeka čiji je život bio posvećen služenju i odbrani domovine. Ukopan je 10. 1. 2026. na Centralnom mezarju u Miričini.

09.01.2026.

Izdvojeno više od 300.000 KM za dodatne količine pitke vode na području Gračanice

Kako je objavljeno na Radio Gračanici ministar poljoprivrede, šumarstva i vodoprivrede Tuzlanskog kantona, Fedahija Ahmetović, potpisao ugovore sa gradonačelnikom Gračanice Sadmirom Džebom ukupne vrijednosti oko 300.000 KM za dodatne količine pitke vode. Ovaj ugovor je dio napora da se unaprijedi snabdjevanje vodom za građane i privredu Gračanice, posebno u svjetlu ranijih problema sa pritiskom i kvalitetom vode u nekim mjesnim zajednicama. Grad se obavezao na transparentno i efikasno korištenje sredstava.

28. 1. 2026.

Izbor najboljih sportista i sportskih kolektiva Grada Gračanica za 2025. godinu

U Velikoj sali BKC-a Gračanica, pred brojnim građanima i ljubiteljima sporta, održana je tradicionalna manifestacija "Izbor najboljih sportista i sportskih kolektiva Grada Gračanica" za 2025. godinu. Bila je to večer posvećena uspjesima, trudu i sportskom duhu – od najmlađih pionira do iskusnih seniora, ali i svih onih koji svojim radom stoje iza rezultata. Titulu najuspješnijeg sportiste ponio je šahista Muhamed Šišić (ŠK Gračanica), dok je najuspješnija sportistkinja Amina Karić (ŽOK Gračanica). Za najuspješniji muški

kolektiv izabran je NK Bratstvo, a u ženskoj konkurenciji ŽOK Gračanica. Priznanje za najboljeg trenera pripalo je Darku Mehmedoviću, dok je za najboljeg sportskog radnika proglašen Haris Okanović (MNK Kaskada). Nagrađeni su i najuspješniji omladinci u pojedinačnim i kolektivnim sportovima, potvrđujući da Gračanica ima snažnu i perspektivnu sportsku budućnost. Posthumna priznanja za doprinos razvoju sporta dodijeljena su Nerminu Muderizoviću-Caru i Osmanu Mešiću. U kategoriji školskog sporta istaknuti su profesor Nedim Šišić (MSŠ Gračanica) i nastavnik Šefik Memić (OŠ Hasan Kikić), dok su njihove škole ponijele titule najuspješnijih u svojim konkurencijama. Večer je upotpunjena muzičkim nastupom Naide i Mejdija Sulejmanija, a završena je uz zajedničku poruku – da sport u Gračanici nastavlja rasti, jačati i donositi nove uspjehe.

29. 1. 2026.

Održana 15. sjednica Gradskog vijeća Gračanica: gradski parkinzi povjereni na upravljanje JP "Komus"

Na sjednici Gradskog vijeća Gračanica, između ostalog, usvojene su izmjene odluka iz socijalne i komunalne oblasti: precizirani su uslovi za ostvarenje prava na obavezno zdravstveno osiguranje lica u statusu socijalne potrebe, te izmijenjene odredbe o komunalnim djelat-

nostima. Vijeće je usvojilo i izmjene Odluke o javnim parkiralištima: sistem naplate usklađuje se s novim statusom Grada, upravljanje se povjerava JP "Komus" d.o.o. Gračanica, a uvode se savremeniji načini plaćanja (automat, SMS i aplikacija). Tarife su utvrđene na 1 KM/sat (dnevna 6 KM, mjesečna 40 KM, godišnja 400 KM), uz doplatnu dnevnu kartu kao blažu mjeru umjesto "kandže" za vozila s domaćim tablicama (blokada ostaje za vozila sa stranim tablicama). Zaključeno je i da se u naplatu uključi bočno parkiralište kod zgrade Gradske uprave, te da se dio prihoda od parkiranja usmjeri MZ Gračanica. Razmatran i usvojen je Izvještaj o rješavanju upravnih stvari u 2025. godini: u radu je bilo 7.659 predmeta, od čega je 93,69% riješeno u zakonskom roku; tokom godine izdano je 44.437 uvjerenja po službenoj evidenciji i 1.690 uvjerenja po članu 170. ZUP-a. Vijećnici su dali saglasnost na odluku o visini naknade članovima Gradske izborne komisije, usvojili Izvještaj o radu Gradskog vijeća i radnih tijela za 2025. godinu, razmotrili Program ostvarivanja politike grada i aktivnosti gradonačelnika za 2026. godinu, te primili k znanju Informaciju o provođenju preporuka Gender centra FBiH.

13. 2. 2026.

Svečana akademija povodom 70 godina rukometa u Gračanici – dodijeljena priznanja i zahvalnice, promovisana monografija RK “Gračanica” autora Nedima Musića

Svečanoj akademiji prisustvovao je veliki broj bivših i sadašnjih rukometaša, sportskih radnika, predstavnika sportskih institucija i građana. Nakon intoniranja himne Bosne i Hercegovine program je započeo prikazivanjem dokumentarnog filma posvećenog historiji kluba i monografiji *RK Gračanica 1956–1992*. U uvodnom dijelu prisutnima se obratio aktuelni predsjednik kluba Semir Suljić, nakon čega su uslijedila obraćanja zvaničnika. Među njima se posebno istakao govor gradonačelnika Gračanice Sadmira Džebe, koji je naglasio značaj rukometnog kluba kao jednog od najprepoznatljivijih sportskih simbola grada i važnog dijela njegovog društvenog i sportskog identiteta. U nastavku programa upriličena je promocija monumentalne monografije o historiji kluba (blizu 1.000 stranica), u kojoj su učestvovali promotori i recenzenti Vedada Baraković, Omer Hamzić i Besim Duraković, kao i autor monografije Nedim Musić. Tokom akademije predstavljena je i Matična knjiga kluba kao simbol kontinuiteta i pripadnosti generacija koje su kroz sedam decenija djelovanja bile povezane s RK “Gračanica”. U završnom

dijelu programa dodijeljena su zlatna priznanja najzaslužnijim pojedincima i institucijama za razvoj kluba. Srebrna i bronzana priznanja, kao i zahvalnice, uručene su većem broju bivših igrača, sportskih radnika i saradnika, uz javno prozivanje i preuzimanje priznanja na svečanoj bini u prepunoj sali Bosanskog kulturnog centra. Svečana akademija završena je druženjem učesnika i gostiju, uz podsjećanje na bogatu sportsku tradiciju rukometa u Gračanici, koja traje još od sredine XX stoljeća.

18. 2. 2026.

Redovna izvještajno-izborna skupština Udruženja penzionera/umirovljenika Gračanica: za novog predsjednika izabran Ibrahim Nurkić

Prije izbornog dijela Skupština je usvojila Izvještaj o radu Udruženja za protekli period, u kojem su pobrojane brojne aktivnosti ostvarene tokom prethodnih godina, posebno one usmjerene na poboljšanje materijalnog položaja penzionera i umirovljenika, a naročito na pružanje konkretne pomoći članovima s najnižim primanjima i onima kojima je ta pomoć bila najpotrebnija. Na sličnim osnovama koncipiran je i Program rada za naredni period, iz kojeg se jasno vidi da novo rukovodstvo očekuje obiman i odgovoran posao. Umjesto dosadašnjeg predsjednika Upravnog odbora Faruka Delića, kojem je istekao mandat,

za novog predsjednika izabran je Ibrahim Nurkić, jedan od istaknutijih organizatora odbrane Gračanice u ratu 1992–1995, ratni načelnik Štaba OG-2 Gračanica, a poslije rata vrijedan društveni radnik i aktivista. U javnom životu Gračanice posebno se istakao kao koordinator boračkih organizacija, te kroz angažman u organizacijama Crvenog križa i Udruženju antifašista Gračanica. Za novog predsjednika Skupštine Udruženja izabran je Fadil ef. Karić, donedavni imam Šarene džamije u Gračanici.

20. 2. 2026.

Umro gračanički muzičar

Ibrahim Čajić – Klipi...

... pjevač, kantautor, kompozitor, gitarista, klavijaturist, aranžer i autor tekstova, zabavljač, a iznad svega čovjek iz one prepoznatljive gračaničke raje. Njegova muzika i vedri duh obilježili su brojne porodične svečanosti, druženja i kulturna dešavanja u gradu, zbog čega je ostao u trajnom sjećanju mnogih Gračanlija. Povodom njegove smrti, jedna Gračanka, danas daleko od Bosne, na Facebook stranici Radio Gračanice zapisala je svoje emotivno sjećanje: "Odrasla sam uz tvoju muziku. Znao si mi svirati, i to po nekoliko puta, 'Hano Hančice, ne na kišu, ne na kišu bez kabanice'. Bila mi je to omiljena pjesma kada sam bila mala. Čak sam mislila da pjevaš o mojoj majci Hani." Druga slušateljka prisje-

tila se i njegove topline i ljudskosti i napisala: "Uvijek si znao koje pjesme volim i znao si napraviti pravu atmosferu na našim porodičnim feštama. Bio si veliki čovjek sa dušom da pomogneš drugima." Manje je poznato da je Ibrahim Čajić još sedamdesetih godina bio član jednog od prvih, a možda i prvog vokalno-instrumentalnog sastava (VIS) rok muzike u Gračanici – "MAK", u kojem su među frontmenima bili Vojo, Klipi i Veseli. Ovaj sastav priređivao je prve moderne muzičke svirke u gračaničkoj čaršiji, na omladinskim dernećima i igrankama. Njihovi nastupi ostali su zabilježeni i u studiju Radio Gračanice, gdje su snimane i izvedbe korištene kao špica popularne zabavno-muzičke emisije "I tome slično", koju je osmislio i nekoliko godina pripremao i vodio Omer Hamzić. Nešto kasnije, nakon otvaranja prve faze Doma kulture 1978. godine, u čijem je sastavu djelovao i disko-klub, tada jedan od najopremljenijih u regionu, Klipi je kao prvi disko-džokej i domaćin postao jedan od prepoznatljivih aktera kulturnog života Grada. Njemu zahvaljujući, taj disko klub je bio najbolji i jedno vrijeme najposjećeniji u regionu. Uz nesumnjiv muzički talent Klipi je ostao upamćen i kao pouzdan saradnik i iskren prijatelj mnogim svojim sugrađanima. Umro je u 74. godini života i ukopan je februara 2026. godine na mezarju Drafnići.

27. 2. 2026.

**Obilježen Dan nezavisnosti
Bosne i Hercegovine: centralna
manifestacija za Tuzlanski
kanton održana u Gračanici**

Manifestacija je započela polaganjem cvijeća na Centralnom spomen-obilježju žrtvama rata 1992–1995. u parku kod srednjoškolskog centra. Cvijeće su položili predstavnici Grada Gračanice i Koordinacije boračkih udruženja, delegacija Skupštine Tuzlanskog kantona na čelu s predsjednikom Žarkom Vujovićem, delegacija Vlade TK predvođena premijerom Irfanom Halilagićem, predstavnici Koordinacije boračkih saveza TK i Udruženja “Zlatni ljljani” Gračanica, kao i predstavnici Kantonalne uprave za inspekcijske poslove. Poseban dio programa činili su učenici osnovnih i srednjih škola koji su učestvovali u svečanom defileu kroz grad, naglašavajući tim simboličnu ulogu mladih generacija u očuvanju vrijednosti nezavisnosti i državnosti Bosne i Hercegovine. Centralna manifestacija, uz bogat kulturno-umjetnički program, održana je u sportskoj dvorani “Bazen”, uz učešće više od 3.000 učenika i učenika iz cijelog Tuzlanskog kantona.

1. 3. 2026.

**Svečano obilježen Dan
nezavisnosti Bosne i Hercegovine**

U okviru programa obilježavanja delegacije lokalne vlasti, politike i boračkih udruženja položile su cvijeće na Centralno spomen-obilježje Odbrambeno-oslobodilačkog rata 1992–1995., gdje je odata počast svim braniocima i građanima koji su dali doprinos slobodi i nezavisnosti Bosne i Hercegovine. Svečana akademija održana je u prisustvu velikog broja zvanica i građana. Program je započeo intoniranjem himne Bosne i Hercegovine u izvedbi orkestra Osnovne muzičke škole Gračanica, nakon čega se prisutnima obratio gradonačelnik Gračanice Sadržmir Džebo, ističući historijski značaj Dana nezavisnosti i potrebu da se trajno njeguju vrijednosti slobode, zajedništva i državnosti. Kulturno-umjetnički dio programa pripremili su učenici Osnovne muzičke škole Gračanica.

3. 3. 2026.

**Održana 16. sjednica Gradskog
vijeća Gračanica: izvještaji i
informacije, mandati po mjesnim
zajednicama**

Između ostalog, usvojena je i Odluka o kandidovanju projekata u Program javnih investicija Federacije Bosne i Hercegovine za period 2027–2029. godine, uz izmjenu u stavu I, tačka 7, koja glasi: “Rekonstrukcija ulice Alije Izetbegovića sa trgom”. Od osta-

lih tačaka, spomenimo da su k znanju primljeni Izvještaj o realizaciji Programa rada, ostvarivanju politike Grada i aktivnostima gradonačelnika za 2025. godinu, Izvještaj o odabiru projekata po javnom pozivu za sportske kolektive u 2025. godini, Informacija o realizaciji vijećničkih inicijativa i pitanja u 2025. godini, kao i Informacija o stanju zaštite od požara i vatrogastva, te praćenju i izvršenju Plana zaštite od požara na području grada za 2025. godinu. Tokom rasprave vijećnici su se osvrnuli i na pitanja razvoja lokalne infrastrukture, realizacije investicionih projekata i administrativnih procedura u radu gradske uprave, potvrđujući značaj redovnih sjednica Gradskog vijeća kao mjesta odlučivanja o ključnim pitanjima lokalne samouprave. *Izvor: Grad Gračanica – službene informacije sa sjednice Gradskog vijeća.*

3. 3. 2026.

Svi učenici i studenti koji su ispunili uslove dobili stipendiju Grada za školsku/akademsku 2025/2026. godinu

Za ovu namjenu, kako je saopšteno na službenom portalu Grada, iz gradskog budžeta bit će izdvojeno više od pola miliona konvertibilnih maraka, čime je još jednom potvrđeno da ulaganje u znanje i obrazovanje ostaje jedan od ključnih prioriteta ove lokalne uprave. Odlukom je osigurana podrška svim kandidatima koji su blagovremeno aplicirali i is-

punili kriterije definisane javnim konkursom, uz poštivanje principa transparentnosti i jednakog tretmana za sve prijavljene. Uz ovu informaciju objavljen je i spisak svih učenika i studenata kojima je stipendija odobrena za školsku i akademsku 2025/2026. godinu.

3. 3. 2026.

Poduzetnici iz Gračanice posjetili su Srebrenicu i uručili donaciju EMMAUS-u

Delegacija Udruge poslodavaca i samostalnih poduzetnika Gračanice boravila u posjeti Srebrenici, gdje su prvo posjetili Memorijalni centar u Potočari, a zatim i projekte humanitarne organizacije Međunarodni forum solidarnosti – EMMAUS u Potočarima, a posebno internat za djecu iz udaljenih mjesta u regiji Srebrenice, kao i programe podrške majkama Srebrenice. Tijekom ove posjete, gračanički gospodarstvenici uručili su donaciju u ukupnom iznosu od 40.000 KM u znak podrške radu EMMAUS-a u području Srebrenice. Ova akcija može se shvatiti kao primjer društvene odgovornosti lokalnog gospodarstva, ali i kao znak da Gračanica želi ostati povezana sa Srebrenicom i njenim narodom kroz konkretne akcije.

5. 3. 2026.

Delegacija iz turskog Kocaelija posjetila Gračanicu i prisustvovala zajedničkom iftaru za oko hiljadu postača

Grad Gračanica ugostio je delegaciju iz turskog grada Kocaeli, predvođenu gradonačelnikom Tahinom Büyükakınom i njegovim saradnicima. Tokom posjete u Gradskoj upravi održan je sastanak na kojem su domaćin, gradonačelnik Sadmir Džebo, i njegov gost razgovarali o dosadašnjoj saradnji dvaju zbratimljenih gradova, kao i o mogućnostima njenog daljeg razvoja i jačanja partnerskih odnosa. Potvrđene su snažne veze između Gračanice i gradova iz Republike Turske te opredjeljenost za nastavak saradnje kroz različite projekte i zajedničke aktivnosti. Nakon zvaničnog sastanka članovi delegacije prošetali su centrom grada, gdje su imali priliku upoznati se s urbanim ambijentom i kulturno-historijskim znamenitostima Gračanice. Posjeta je nastavljena u sportskoj dvorani "Luke", na zajedničkom iftaru za oko hiljadu postača, koji su priredili gradovi Kocaeli, Gračanica, fondacija "Maarif", Medžlis Islamske zajednice Gračanica i Međunarodni forum solidarnosti "Emmaus". Iftarsko druženje proteklo je u duhu mjeseca ramazana, u znaku zajedništva, solidarnosti i prijateljstva... *Izvor: Radio Gračanica.*

26. 3. 2026.

Održana 17. sjednica Gradskog vijeća Gračanica – dug Grada, upis u srednje škole i stanje u javnim ustanovama

Opsežnim dnevnim redom od 20 tačaka dominirala su pitanja gradskog zemljišta, komunalne politike, organizacije gradske uprave, financijskog stanja Grada i rada javnih ustanova. Među važnijim temama izdvaja. Jedna od najznačajnijih tačaka bio je Izvještaj o dugu Grada Gračanice za 2025. godinu, prema kojem je ukupni dug na kraju godine iznosio 4.941.053 KM, što je smanjenje u odnosu na početak godine kada je iznosio 6.192.665 KM. Od toga se na vanjski dug odnosi 2.357.806 KM, a na unutarnji dug 2.583.245 KM, dok su ukupne obaveze po kamatama na kraju godine iznosile 1.019.937 KM. Grad je u posmatranom periodu imao četiri aktivna kreditna zaduženja, dok su ukupne obaveze po kamatama na kraju godine iznosile 1.019.937 KM. Prihvaćeni su i planovi upisa učenika u prve razrede srednjih škola za školsku 2026/2027. godinu. U Gračanici ove godine osnovnu školu završava 460 učenika, što je za pet više nego prethodne godine, kada ih je bilo 455. Gimnazija "Dr. Mustafa Kamarić" planira upis 72 učenika, a Mješovita srednja škola 480 učenika u 20 odjeljenja, pa je izvjesno da će u gračaničkim srednjim školama biti dovoljno mjesta za sve svršene

osnovce. Usvojen je i Izvještaj o radu Javne ustanove "Bosanski kulturni centar" Gračanica za 2025. godinu, koje pokazuje da je tijekom godine ostvareno 83 kulturna sadržaja, uz neprekidni 24-satni program Radio Gračanice s 93 posto vlastite produkcije. BKC je u 2025. godini radio sa 16 do 17 zaposlenika, a uz redovne programske aktivnosti, određene Među razmatranim izvještajima, posebno mjesto imao je Izvještaj o radu Doma zdravlja Gračanica za 2025. godinu. Na kraju godine ova je ustanova imala 228 zaposlenika, uključujući 57 liječnika medicine, od kojih je 24 specijalista, 25 liječnika opće prakse i 8 liječnika specijalizacije. Istovremeno, istaknuto je stalno opterećenje zdravstvenog sustava i potreba za daljnjim kadrovskim popunjavanjem, dok je higijensko-epidemiološka situacija ocijenjena kao nezadovoljavajuća.

30. 3. 2025.

Održana Izorno-izvještajna skupština Sportskog saveza Gračanica: za predsjednika izabran dr. Avdo Kurtović

Uz prisustvo i aktivno učešće u radu 31 delegata (velika sala BKC-a) razmatran je prilično obiman dnevni red: izbor radnih tijela Skupštine, verifikacija delegata i prisutnih članova, izbor predsjednika i dopredsjednika Skupštine, izbor članova Upravnog i Nadzornog odbora, te razmatranje izvještaja o radu i finan-

sijskog izvještaja za 2025. godinu, kao i izvještaja Nadzornog odbora za period od 1. 1. do 31. 12. 2025. godine. Za predsjednika Skupštine jednoglasno je izabran Avdo Kurtović, a za dopredsjednika Enes Begović. U novi Upravni odbor izabrani su Almedina Ahmeljić-Smajlović, Nihad Hadžihasanović, Haris Okanović, Ibrahim Žunić, Jasmin Salihbašić, Namik Mustafić i Semir Suljić. O novom predsjedniku Sportskog saveza odlučit će Upravni odbor na svojoj prvoj narednoj sjednici.

30. 30. 2026.

Komedija redateljice Mirele Trepanić Grbešić "Prvi put" odigrana 28. i 30. marta u BKC-u Gračanica

Komedija se bavi muško-ženskim odnosima, usamljenošću, strahom od neuspjeha i potragom za bliskošću u vremenu površnih kontakata i virtualnih poznanstava. U glavnim ulogama nastupili su Lejla Letić i Amar Mujkić. Predstave su privukle veliku pažnju i oduševljenje domaće publike, a redateljica Mirela Trepanić Grbešić time još jednom potvrdila da neumorno nastavlja svoj uspješni kazališni angažman, nakon zapaženih hit komedija "Ja, mahaluša", "Gole žene..." i "Skidajte se do kraja", za koje se uvijek tražila karta više.

31. 3. 2026.***Sprečko polje ponovo pod vodom***

Nova poplava rijeke Spreče krajem marta ponovo je potopila Sprečko polje i otvorila stari problem koji se gotovo redovno ponavlja nakon svake obilnije kiše, ponekad i dva puta godišnje. Ovoga puta pod vodom je bilo više od 200 hektara zemljišta, a najveće posljedice ponovo su pretrpjeli poljoprivrednici i stanovništvo nizvodno od brane Modrac. Povodom novih poplava u uredu gradonačelnika Gračanice održan je sastanak na kojem su nadležni još jednom razmatrali uzroke i moguće mjere za ublažavanje posljedica. Time je ponovo potvrđeno koliko je ovo područje izloženo stalnoj opasnosti od poplava i koliko dugo izostaju konkretni zahvati koji bi dali trajnije rezultate. U prvi plan ponovo su izbili neriješeni problemi regulacije korita Spreče, njenih pritoka i režima upravljanja hidroakumulacijom Modrac. Dok se odgovornost i dalje raspršuje između više institucija, Sprečko polje i njegovo stanovništvo ostaju u istom krugu periodičnih poplava, šteta i neispunjenih obećanja.

4. 4. 2026***Službe za civilnu zaštitu susjednih lokalnih zajednica: Grada Gračanice (F BiH) i opštine Petrovo (RS) zajenički spasili dva mladića iz nabujale rijeke Spreče***

Na dojavu zaprimljenu u 06.54 sati da su dva mladića ostala zarobljena u nabujaloj rijeci Spreči, službe civilne zaštite Grada Gračanice i opštine Petrovo brzo su organizovale zajedničku akciju spašavanja. Kako je saopšteno, mladići su, vozeći se kombijem iz pravca Porječine prema Miričini preko poplavljenog puta, bili zahvaćeni bujicom. Voda je vozilo ponijela i na sreću zaustavila, nakon čega su se, spašavajući živote, mladići sklonili na njegov krov vouila i tu čekali pomoć. U akciji su službe iz Gračanice i Petrova djelovale usklađeno s obje strane. Tim iz Gračanice intervenisao je čamcem iz pravca Miričine, dok je ekipa iz Petrova pristupila iz pravca Porječine vatrogasnim vozilom. Uprkos snažnoj bujici i veoma teškim uslovima na terenu, akcija je uspješno okončana oko 7.30 sati, a spašena su dva mladića: S. C. iz Petrova i A. A. iz Porječine. Ovaj događaj još jednom je pokazao da entitetska granica ne znači ništa kada je u pitanju solidarnost i spašavanje ljudskih života. (izvor: službeni portal Gradske uprave Gračanica).

7. 4. 2026.

**Obilježen Dan oslobođenja
Gračanice u Drugom svjetskom
ratu**

Gračanica je proslavila 7. april– Dan oslobođenja Gračanice u Drugom svjetskom ratu. Tim povodom položeno je cvijeće na Središnji spomenik obrambenog i oslobodilačkog rata 1992. – 1995., kao i na Spomen-obilježje oslobođenja Gračanice. Proslava je nastavljena svečanom akademijom s kulturno-umjetničkim programom i časom historije u Osnovnoj muzičkoj školi (govorio: Edin Šaković, direktor BKC), a zatim je otvorena XII samostalna izložba slika Mehmeda Imamovića pod nazivom “Palestina, zemlja u kojoj djeca ne odrastaju” (foaje BKC-a).

15. 4. 2026.

**Obilježen Dan Armije RBiH u
Gračanici**

Uz prisustvo predstavnika lokalne vlasti, boračkih organizacija, porodica poginulih boraca i više građana na Centralnom spomen obilježju položeno je cvijeće i izveden kraći kulturno-umjetnički program. Prisutnima su se obratili predsjedavajući Gradskog vijeća Grada Gračanica Mirza Okić i jedan od komandanata mješovitog artiljerijskog divizionu, pukovnik u penziji Sedin Bostandžić.

**...i Lukavici tim povodom
otvorena Spomen soba**

...posvećena braniočima Lukavice i ovog kraja. Kraći osvrt na ratna dejstva na tom prostoru dao je historičar Edin Šaković, istakavši, da su braneći Lukavicu i BiH poginula 42 borca iz Lukavice, a preko 100 njih je teže ili lakše ranjeno. Svojim emotivnim iskazom prisutnima se obratio i prvi komandant bataljona Mehmeda Kruškić. Nakon otvaranja spomen sobe prikazan je i dokumentarni film o ratnoj Lukavici.

22. 4. 2026.

**Promocija Zbornika radova
sa Međunarodne naučne
konferencije “Država i pravo –
izazovi i perspektive: Gračanička
škola lokalne historije”, povodom
50 godina spisateljskog i naučnog
rada Omera Hamzića i 30 godina
časopisa Gračanički glasnik**

Promocija je održana u sali Osnovne muzičke škole u Gračanici. Promotori su bili: prof. dr. Amir Karić, rektor Univerziteta u Tuzli, prof. dr. Vedad Gurda, dekan Pravnog fakulteta Univerziteta u Tuzli, prof. dr. Edin Mutapčić, urednik Zbornika i organizator Konferencije, prof. dr. Adnan Jahić i prof. dr. Izet Šabotić, Filozofski fakultet Univerziteta u Tuzli. Promociju je moderirala Senada Letić, šefica Biblioteke “Dr. Mustafa Kamarić” Gračanica. Riječ je o Zborniku radova sa Međunarodne naučne konferen-

cije održane u Tuzli, u organizaciji Naučnog društva pravnika Tuzla i Pravnog fakulteta Univerziteta u Tuzli. U Zborniku su objavljena 32 rada na 640 stranica, koji donose vrijedne uvide u stvaralaštvo Omera Hamzića i doprinos Gračaničkog glasnika razvoju lokalne historije. Realizaciju konferencije i izdavanje Zbornika finansijski su podržali Federalno ministarstvo obrazovanja i nauke i Vlada Tuzlanskog kantona. Promotori, ugledne ličnosti iz akademskog miljea Tuzlanskog kantona, govorili su o Zborniku biranim riječima, ističući njegov naučni značaj, tematsku širinu i metodološku utemeljenost, kao i doprinos koji rad Omera Hamzića i Gračaničkog glasnika daje razvoju lokalne historiografije. Posebno je naglašeno da Zbornik predstavlja vrijedan doprinos afirmaciji jedne prepoznatljive istraživačke prakse, oblikovane kroz višedecenijski rad u okviru tzv. gračaničke škole lokalne historije. Zahvalivši se promotorima i učesnicima, Hamzić je istakao da Zbornik vidi kao "javnu ocjenu" svog dosadašnjeg rada, kroz Zbornik kao svojevrsni pedesetogodišnji bilans u kojem su objedinjeni knjige, naučni radovi i tridesetogodišnji kontinuitet Gračaničkog glasnika. Naglasio je da njegov rad nije bio vođen titulama i priznanjima, nego željom da se istraži i sačuva ono što ne smije pasti u zaborav, te da nove generacije ne moraju počinjati

od nule. "Privilegovan sam i sretan pri pomisli da sve to ostaje iza mene kao vakuf – za dobro svih onih koji žele znanje i teže učvršćivanju identiteta ovoga grada i naše države Bosne i Hercegovine." Sa ove promocije na adresu gradonačelnika i predsjedavajućeg Gradskog vijeća upućena je inicijativa da se Omeru Hamziću dodijeli priznanje ili nagrada za životno djelo.

28. 4. 2026.

Održana 18. sjednica Gradskog vijeća: izvršenje Budžeta za 2025. i godišnja priznanja Grada

Gradsko vijeće usvojilo je više važnih akata iz oblasti finansija, organizacije uprave i rada javnih preduzeća. U središtu sjednice bili su izvještaj o izvršenju budžeta za 2025. godinu, izvještaj o korištenju tekuće rezerve, kao i pregled izvršenja budžeta u prva tri mjeseca 2026. godine. Vijeće je razmotrilo i izvještaj o dugu grada za prvi kvartal, čime su finansijska pitanja ponovo bila u vrhu dnevnog reda. Nakon burne rasprave, usvojena je i odluka o dodjeli gradskih priznanja za 2026. godinu, kao i nova odluka o organizaciji i djelokrugu rada jedinstvenog gradskog organa uprave, što ovoj sjednici daje i širi institucionalni značaj. Među važnijim tačkama bile su i odluke iz oblasti prostornog uređenja i imovinsko-pravnih odnosa, uključujući saglasnost za izgradnju elektroenergetskog objekta i odluku o pro-

daji nekretnine. Vijeće je skinulo sa dnevnog reda godišnje izvještaje o radu i finansijskom poslovanju triju javnih preduzeća – “Veterinarske stanice”, “Vodovoda i kanalizacije” i “Komusa”, što ne zaslužuje nikakav komentar. Na dnevnom redu našli su se i prijedlog ugovora o ustupanju i preuzimanju ugovora o zakupu prostora sa Udruženjem SOS Dječija

sela, kadrovske odluke u mjesnoj zajednici Vranovići, dopuna odluke o imenovanju vijeća MZ Malešići, te izvještaj o realizaciji programa rada vijeća mjesnih zajednica sa programima rada za tekuću godinu. Tako je sjednica, uz finansijske i komunalne teme, zahvatila i pitanja lokalne organizacije i funkcionisanja mjesnih zajednica.

